

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. रक्षामंत्री राजनाथ सिंह होरें अज्ज जीएमसी जम्मू जाइयै चशौती ग्रांऽ च बद्दल फट्टने करी जख्मी होए दे लोकें दी डौल पुच्छी। मौसम दे खराब सूरतेहाल करी ओहू चशौती ग्रांऽ नेई पुज्जी सके।
2. उपराज्यपाल मनोज सिन्हा होरें अज्ज जीएमसी जम्मू दा दौरा लाया ते पीड़ितें दी डौल पुच्छी। उनें आखेआ जे प्रशासन, प्रभावितें दी राहत ते पुनर्वास लेई हर मुमकिन जत्त करा'रदा ऐ।
3. मुखमंत्री उमर अब्दुल्ला होरें जम्मू-कश्मीर च बड़ी भारी बरखें दे मद्देनजर मुतल्लका मैहकमें गी हाई अलर्ट पर रौहने दा निर्देश दिता ऐ।
4. आई.आई.आई.एम जम्मू दे होस्टल दे ग्राउंड फ्लोर च भारी बरखें कारण जमा होए दे पानी च फंसे दे विद्यार्थियें गी सुरक्षित बाहर कड्डी लैता ऐ।
5. जम्मू-कश्मीर थमां 2 एथलीटें थाईलैंड च आयोजित एशियाई बांडी बिल्डिंग ते फिजीक चैंपियनशिप च तगमे जित्तियै भारत दा नां रौशन कीता ऐ।

<><><><><><>

Rajnath-Visit

रक्षा मंत्री राजनाथ सिंह होर अज्ज दपैहरी जम्मू पुज्जे ते इत्थें पुज्जदे गै ओहू जीएमसी जम्मू पुज्जे जित्थे उनें किशतवाड जिले दे चशौती ग्रांऽ च हाल च गै बद्दल फट्टने आहली कुदरती क्रोपी च जख्मी होए दे लोकें दा हाल पुच्छेया। जख्मियें कन्नै मिलने परैंत श्री सिंह होरें आखेआ जे ओहू बी हाड कन्नै प्रभावित थाहर चशौती जाना

चाहंदे हे, पर खराब मौसम करियै एहू मुमकन नेई होई पाया। उनें दस्सेआ जे अस्पताल च दाखल लोकें दा इलाज कीता जा करदा ऐ ते उंदी हालत स्थिर ऐ। राजनाथ सिंह होरें आखेआ

अपने दौरे परेंत रक्षा मंत्री होरें दिल्ली आस्तै वापस परतोई गे ना। ध्यानजोग ऐ जे चशौती च कुदरती क्रोपी कन्नै नेकें लोकें दी जान चली गई ते नेकां अजें बी लापता ना।

<><><><><><>

LG-GMC Visit

लेफ्टिनेंट गवर्नर मनोज सिन्हा होरें अज्ज जम्मू दे गौरमैट मेडिकल कॉलेज अस्पताल जाइयै किशतवाड़ दे चशौती ग्रां च बद्दल फटने दी कुदरती क्रोपी च जख्मीं होए दे लोकें कन्नै मलाटी कीती। इस मौके मीडिया कन्नै गल्लबात करदे होई श्री सिन्हा होरें दस्सेआ जे चशौती थमां आहन्ने गेदे जखिमएं दा ऐल्लै जीएमसी जम्मू च इलाज चलै 16 करदा ऐ ते सब्भनें दी हालत स्थिर ऐ। उ'नें आखेआ जे राहत ते आबादकारी सरबंधी हीलें गी तेज रफ्तार कन्नै तोढ चाढेआ जा'रदा ऐ ते सरकार प्रभावत परोआरें दी मदाद लेई हर संभव जतन करै करदी ऐ। उ'नें दस्सेआ जे तकरीबन लोक अजें बी लापता ना। एलजी होरें प्रभावत लोकें गी हर मुमकन मदाद दा भरोसा दोआया ऐ। 32 श्री सिन्हा होरें प्रभावित लोकें गी हर मुमकन मदाद दा भरोसा दोआया। मीडिया कन्नै गल्ल करदे होई एल.जी होरें आखेआ।

<><><><><><>

CM-Alert

जम्मू-कश्मीर च जारी भारी बरखा दे मद्देनज़र मुख्मंत्रि ओमर अब्दुल्ला होरें सब्भनें सरबंधत मैहकमें गी निर्देश दित्ते न जे ओहू हाई अलर्ट पर रौहना। ध्यानजोग ऐ जे संभाग दे बक्ख-बक्ख हिस्सें च जंदी रातीं थमां होआ करदी भारी बरखा करी केई इलाकें च पानी भरोची गेदा ऐ ते नदी-नाले खतरे दे निशान कोला उप्पर बगा करदे ना।

सरकारै, सरबंधत नियंत्रण कक्षें गी सक्रिय करी दित्ते दा ऐ ते मुखमंत्री हुं'दे दफ्तरै, सभनें मैहकमें कन्नै लगातार राबता बनाए दा ऐ। रिहायशी इलाकें च जमा होए दे पानी गी कडुने ते बिजली ते पानी जनेही अत्त लाजमी सेवाएं दी बहली बक्खी चेचा ध्यान दित्ता जा'रदा ऐ। लोकें गी सौहगा रौहने दी सलाह दित्ती गई ऐ। राहत ते बचाऽ टीमें गी कुसै चाल्ली दे बी हालात कन्नै निबडने लेई तैयार बर तैयार रक्खेआ गेदा ऐ।

<><><><><><>

Cycling-Marathon

सेहत, फिटनेस ते सामुदायिक हिस्सेदारी गी बढ़ावा देने आहली इक पहल तहत जम्मू-कश्मीर पुलस नै अज्ज रियासी च फिट इंडिया मूवमेंट तहत इक साइकिलिंग मैराथन दा सरिस्ता कीता। भीमगढ़ किले थमां रम्भ होई दी इस मैराथन च नौजोआनें, विद्यार्थियें, पुलस कर्मियें, जोशे-खरोश कन्नै हिस्सा लैता। रैली सीला च पुज्जियै सम्पन्न होई। इस मौके बोलदे होई DSP IRP 1st Batalion संजय अबरोल होरें आखेआ जे फिटनेस शडा जिसमानी मजबूती बारै नेई सगुआं दमागी लचीलापन ते अनुशासन बनाने बारै च बी ऐ। उनें आखेआ।

<><><><><><>

PTC Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां ना। इच्छुक आवेदक जेहदी उमर 24 थमां 50 ब'रें दे बश्कार ऐ ते ओहू जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी

पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

IIIM-Flood Water

भारती एकीकृत चिकित्सा संस्थान आई.आई.आई.एम दे घट्टोघट्ट 45 विद्यार्थियें गी अज्ज राज्य आपदा प्रतिक्रिया बल एसडीआरएफ ते पुलस दे सांझे अभियान च सुरक्षित कड्डी लैता गेआ। ध्यानजोग ऐ जे संस्थान दे होस्टल दे ग्राउंड फ्लोर च पानी जमा होई गेदा हा। अज्ज बड्डुलै नैहरा दा 7 फुट शा बद्द पानी होस्टल दियें इमारतें च जाई बडेआ जिस करियै एसडीआरएफ ते पुलिस नै विद्यार्थियें गी उत्थुआं सुरक्षित कड्डुने आस्तै किशितियें दी मदाद लैती। दस्सेआ गेआ ऐ जे बचा अभियान 5 घंटें शा बी बद्द समें तोड़ी चलेआ ते फसे दे सब्बने विद्यार्थियें गी सुरक्षित कड्डी लैता गेआ। आई.आई.आई.एम दे निदेशक डॉक्टर जबीर अहमद होरें दस्सेआ जे संस्थान नै विद्यार्थियें दे सुरक्षित रौहने दी पूरी बवस्था करी लैती ऐ।

<><><><><><>

Heavy-Rainfall

जम्मू खित्ते च जंदी अज्ज बड्डुलै थमां होआ करदी भारी बरखा करी केई इलाकें च हाड ज्नेहू हालात पैदा होई गेदे ना। भारी बरखा करी रिहायशी इलाकें च पानी किट्टा होने करी सिडकें ते घरें-मकानें गी बी नुक्सान पुज्जा ऐ। भारी बरखा ते हाड करी जम्मू-पठानकोट जरनैली सिडकै पर सहर खड्डु उप्पर बनाए गेदे पुल गी नुक्सान पुज्जा ऐ। मौसम विभाग कल आस्तै बी जम्मू, डोडा, किशतवाड, पुंछ, रजौरी, रामबन, रियासी, सांबा, कठुआ, उधमपुर, अनंतनाग ते कुलगाम च बडी भारी बरखा दी पेशगोई कीती दी ऐ। सरबंधत अधिकारिणं प्रदेश च ते

खास करियै जम्मू संभाग च केई सारी थाहें पर बद्दल फटने, चानचक्क हाड औने ते ल्हास-पस्सियां पौने दी शैंका बी जाहिर कीती ऐ। मौसम विभाग नै कल्लै तोहड़ी इयै नेह हालात बने दे रौहने बारै सोहगा सतर्क करदे होई बसनीकें गी सलाहू दित्ती ऐ जे ओहू अपनी सुरक्षा जकीनी बनाने लेई सब्भै लोडचदी एहतियातां बरतन ते बेवजह सफर कोला बी परहेज करना।

<><><><><><>

Heavy-Rainfall

तोआई, मौसम दे खराब सूरतेहाल गी दिखदे होई जम्मू खित्ते दे सब्भनें स्कूलें गी कल बंद रखने दा ऐलान कीता गेआ ऐ। एहदे अलावा जम्मू-कश्मीर स्कूली शिक्षा बोर्ड नै कल 25 अगस्त गी होने आहले 10मीं ते 11मीं जमात दे मतेयानें गी अगड़ा पाई दित्ता ऐ। बोर्ड नै इस बारै जानकारी इक सोशल मीडिया पोस्ट च सांझी कीती। इनें मतेयानें लेई नमीं तरीखें दी घोषणा बाद च कीती जाग।

<><><><><><>

Samba-Rains

बरा करदी भारी बरखा कारण साम्बा जिले च बसंतर नदी च हाड जनेय हालात बने देन। तोआई, बरखा करियै साम्बा-मानसर-उधमपुर शिडक नेकें थाहरें पर ल्हास-पस्सियां पौने करियै प्रीावित होई दी ऐ जिस कारण इसी बंद करना पेआ ऐ। उआं प्रशासन नै सडक गी साफ करने ताई अमले ते मशीनें गी कम्मै पर लाई दित्ता ऐ। एहदे अलावा सरना, मनानू, दरूई ते होरनें इलाकें दे बसनीकें गी मुश्कलें दा सामना करना पवा करदा ऐ। हाड कन्नै प्रभावित मनानू ग्रांड दे शाम लाल ते सुरिष्टा देवी नै आकाशवाणी समाचार कन्नै गल्ल करदे होई आखेआ।

<><><><><><>

Poonch-Rains

पुंछ जिले दे बक्ख-बक्ख इलाकें च अज्ज बी भारी बरखा जारी रेयी जेदे कन्नै मकामी नदी-नालें च पानी दा स्तर तेजिया कन्नै बदी गेआ ऐ। सुक्खा काठा मोहल्ला इलाके च हालात चैंता आहले बने दे न कीजे पानी दा स्तर बदने

कन्नै लोकं गी अपने घर छोड़ियै सुरक्षित थाहरें पर जाना पेआ ऐ। मकामी लोकें दस्सेआ जे हेठले इलाकें च पानी जमा होने करियै माली नुकसान ते सुरक्षा गी लेइयै चैंता बदी गई ऐ।

<><><><><><>

Athletics

जम्मू-कश्मीर दे 2 एथलीटें 18 थमां कल 25 अगस्त तगर बैंकाक थाईलैंड च आयोजित कीती जा'रदी 57मीं एशियाई बीलिंग ते फिजीक चैंपियनशिप 2025 च देसै दा नां रौशन कीता ऐ। एथलीट विकास खजूरिया नै मर्दे दी स्पोर्ट्स फिजीक वर्ग च सुन्ने दा तगमा जित्तेआ जिल्ले के विमलजीत नै 60 किलोग्राम शा घट्ट भार वर्ग च चांदी दा तगमा अपने नां कीता। दौनें दे बेमिसाल प्रदर्शन नै जम्मू-कश्मीर च मौजूद बेपनाह खेड्डू प्रतिभा गी उजागर कीता ते अंतरराष्ट्रीय मंच पर देसै गी मान दोआया। तोआई, उपमुख्यमंत्री सुरिंद्र कुमार चौधरी होरें दौनें एथलीटें गी शुभकामनां दित्तियां न।

<><><><><><>